

Laman flora RTC jadi hab agropelancongan terbaharu di Kelantan

Bernama
Mei 26, 2023 09:00 MYT

KOTA BHARU: Lembaga Pemasaran Pertanian Persekutuan (FAMA) Kelantan sedang menaik taraf laman flora Pusat Transformasi Luar Bandar (RTC) Tunjong untuk dijadikan sebagai hab agropelancongan terbaharu di negeri itu menjelang Disember tahun ini.

Pengarahnya Wan Faizatul Aniza Ismayatim berkata fasa kedua menaik taraf laman flora ini dilakukan semula sejak ia mula diwujudkan pada 2016 bertujuan menarik lebih ramai pengusaha florikultur dan nurseri di negeri ini untuk memajukan perniagaan mereka selain menjadikannya sebagai pusat rujukan pemasaran hasil pertanian.

"Kita jangka laman flora fasa kedua ini siap Disember ini, pastinya pengunjung dapat menimba ilmu dan pengalaman seperti cara penanaman dengan berkesan, kaedah pemasaran dan sebagainya kerana ia akan dijadikan sebagai pusat rujukan untuk memberi pendedahan kepada petani dan pengunjung.

"Laman flora ini akan memberi impak positif di Kelantan sebagai hab agropelancongan yang bukan sahaja mampu menarik lebih ramai pelabur dan usahawan untuk menjana ekonomi, malah turut membantu para petani meningkatkan hasil pengeluaran tanaman mereka di laman flora ini," katanya ketika ditemui pemberita di FAMA RTC Tunjong, di sini pada Khamis.

Mengulas lanjut, Wan Faizatul Aniza berkata setakat ini laman flora itu mempunyai 85 lot tapak yang diusahakan oleh 72 usahawan dengan pelbagai jenis tanaman bunga dan anak pokok buah-buahan seperti bunga orkid dan bunga keladi.

"Setakat ini, kita mempunyai sebanyak 3,168 usahawan ladang kontrak yang mengusahakan pelbagai jenis tanaman seperti labu, terung dan timun dengan keluasan penggunaan tanah sebanyak 4,331 hektar.

"Bukan itu sahaja, usahawan ladang kontrak yang berdaftar ini juga mampu menghasilkan lebih 47,961 tan metrik tanaman mereka dengan anggaran nilai pengeluaran lebih RM48 juta sejak 2007," katanya.

Beliau berkata terdapat banyak kelebihan dan kemudahan akan disediakan kepada petani yang berdaftar dengan FAMA selain turut menerima bantuan pemasaran sekiranya berdepan dengan isu atau krisis berkaitan dengan perniagaan mereka.

"Antara kelebihan berdaftar dengan FAMA ialah kita menawarkan harga lantai, sekiranya harga komoditi jatuh FAMA tetap akan beli dengan harga lantai yang sudah ditetapkan dalam persetujuan.

"Namun, jika harga melebihi harga lantai, kita akan beli dengan harga semasa jadi banyak manfaat yang akan diperolehi termasuk hubungan baik antara petani dengan agensi," katanya.

-- BERNAMA